

每週經課朗誦經文（巴克禮台語漢字）2012/02/19

共同經課-1 列王紀下二章一節～十二節

1 耶和華欲用捲螺風接以利亞上天的時，以利亞及以利沙對吉甲去。2 以利亞給以利沙講：「你且踣遮，因為耶和華差我去伯特利。」以利沙講：「我指永活的耶和華，及你的活命來咒誓，我無欲離開你。」二人就落去伯特利。3 佇伯特利許個先知的學生出來見以利沙，給伊講：「耶和華今仔日欲取你的老師離開你去，你知嗎？」伊講：「是，我知，恁莫做聲。」4 以利亞給伊講：「以利沙啊，你且踣遮，因為耶和華差我去耶利哥。」伊講：「我指永活的耶和華，及你的活命來咒誓，我無欲離開你。」in 就到耶利哥。5 佇耶利哥許個先知的學生就近以利沙，給伊講：「耶和華今仔日欲取你的老師離開你去，你知嗎？」伊講：「是，我知，恁莫做聲。」6 以利亞給以利沙講：「你且踣遮，因為耶和華差我去約但。」以利沙講：「我指永活的耶和華，及你的活命來咒誓，我無欲離開你。」in 二人就相及去。7 有先知的學生五十人去，遠遠倚佇 in 的對面；二人佇約但河邊啲倚。8 以利亞提伊的外衫捲起來，拍許個水，水就分雙旁，二人行乾地過去。9 過去了，以利亞給以利沙講：「我猶未受取離開你去，我欲給你做甚麼？你今著求。」以利沙講：「求你將感動你的神互我雙份。」10 以利亞講：「你所求的擗(oh)得啊！總是我受取離開你的時，你若看見我，就欲得著，若無，就袂得著。」11 in 啲行啲講，忽然有火車火馬隔開 in 二人，以利亞就坐捲螺風上天。12 以利沙看見，就叫講：「我的父啊！我的父啊！以色列的戰車及伊馬兵啊！」後來無閣看見伊。就提家己的衫來拆做二旁。

共同經課-2 詩篇五十篇一節～六節

1 〔亞薩的詩。〕全能的上帝——耶和華有講出話來召天下，對日出到日落的所在。2 對齊全媛的錫安，上帝有發出光。3 阮的上帝欲來，決斷無靜靜。有火佇伊的面前啲燒；有風佇伊的四圍真透。4 伊欲叫頂面的天及地；為著欲審判伊的百姓，5 講：著招集我聖的百姓來我遮，就是許個用祭祀及我立約的人。6 諸個天欲顯明伊的公義，因為上帝本身是做審判者。（細拉）

共同經課-3 哥林多後書四章三節～六節

3 若阮的福音有所遮蓋，就是遮蓋佇沈淪的人。4 佇 in 中間此世界的上帝互唔信的人的心睛暝，免得基督榮顯的福音的光照 in。基督就是上帝的像。5 因為阮無傳家己，是傳基督耶穌做主，也本身為著耶穌做恁的奴僕。6 因為上帝曾講，光著對暗裡出來的，伊也有照佇阮的心，互阮對識上帝的榮顯，就是對耶穌基督顯明的來得著光。

共同經課-4 馬可福音九章二節～九節

2 過六日，耶穌帶彼得、雅各、約翰另外導 in 緝上高山，干單 in 及伊佇啲，3 當 in 的面前形狀變換，伊的衫燦爛極其白，世間漂布的袂會互伊白到按呢。4 有以利亞及摩西對 in 顯現，及耶穌講話。5 彼得對耶穌講：「拉比，咱佇遮真好！阮來搭三間寮仔，一間互你，一間互摩西，一間互以利亞。」6 是伊唔知著怎樣講，因為 in 真驚。7 就有雲罩 in；閣有聲對雲裡出，講：「此個是我疼的子，恁著聽伊。」8 in 忽然四界看，無看見一人，只有耶穌及 in 佇遐若定。9 in 落山的時，耶穌禁 in 講：「人子猶未對死人中復活，莫得用所看見的給人講。」